

Kerajaan belum ada keputusan ambil alih empat lebuh raya - Tun Mahathir
Astro Awani
09 Julai 2019
Wan Syamsul Amly,

PUTRAJAYA: Kerajaan masih belum mempunyai sebarang keputusan terhadap tawaran mengambil alih konsesi tol daripada Gamuda Berhad (GAMUDA), kata Perdana Menteri, Tun Dr Mahathir Mohamad.

Ia susulan kenyataan Dr Mahathir selepas mengumumkan cadangan untuk mengambil alih empat konsesi lebuh raya bertol berkenaan pada 23 Februari lalu.

"Belum ada apa-apa keputusan," katanya semasa sidang media selepas ucap tama Persidangan Pendidikan Teknikal dan Latihan Vokasional (TVET) 2019 di sini, pada Selasa.

Empat konsesi lebuh raya bertol di mana syarikat GAMUDA mempunyai kepentingan dalam syarikat berkenaan adalah Lebuhraya Damansara Puchong (LDP), Sistem Penyuraian Trafik KL Barat (SPRINT), Lebuhraya Shah Alam (KESAS) dan Terowong SMART (SMART).

Menteri Kewangan, Lim Guan Eng sebelum ini berkata, pengambilalihan keempat-empat lebuh raya itu akan secara langsung menjimatkan pembayar cukai sekurang-kurangnya RM5.3 bilion dalam bentuk bayaran pampasan kepada syarikat-syarikat konsesi untuk membekukan kadar tol di lebuh raya berkenaan sehingga akhir hayat konsesi.

Jelas Guan Eng lagi, model pengambilalihan tersebut tidak melibatkan sebarang perbelanjaan Kerajaan kerana kos pengambilalihan sebanyak RM6.2 bilion yang dibiayai menerusi penerbitan bon serta kos operasi dan penyelenggaraan akan ditanggung sepenuhnya oleh kutipan caj kesesakan.

© 2019 Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/kerajaan-belum-ada-keputusan-ambil-alih-empat-lebuh- raya-tun-mahathir-212204>